

四庫全書

史部

欽定四庫全書

欽定大清通禮卷三十四

嘉禮

皇帝臨雍之禮

命下禮部諏吉具疏以

聞徧布諸司供備豫期行取衍聖公五經博士孔氏裔  
俊秀五人東野氏孔氏顏氏曾氏孟氏仲氏閔氏  
冉氏言氏卜氏顓孫氏端木氏有氏裔各二人乘

傳赴京及各氏子孫見列朝官者直省在京之進士舉人貢監生各學教習肄業諸生咸詣太學觀禮國子監祭酒司業擬經書篇目撰講章豫進

御覽

欽定恭繕以竣

右諏日戒辨

屆期五鼓國子監祭酒率屬灑掃學宮内外工部

司官張

御幄設

寶座於彝倫堂正中南向武備院官供

御座鋪陳鴻臚寺官於幄前稍左設經案東西肆左右

各設講案均南北肆未明祭酒奉

御覽講章陳幄左案書左經右奉進講副本陳書於左

案陳經於右案退

右陳設

辨堂内外班位講官滿漢祭酒二人位堂内左案

西面滿漢司業二人位右案東面記注官位西柱  
下東面侍班王公位講官後大學士九卿詹事位  
王公後糾儀給事中御史位班末聽講羣官暨諸  
生位東西階下執事舉經案國子官二人位堂左  
右門內鴻臚寺鳴贊二人立東西檐下宣制官一  
人立東鳴贊官之右序班二人立於階上又序班  
四人分立庭內左右皆東西面北上辨庭中拜位  
東班衍聖公祭酒西班司業率國子官各學教習

五經博士進士舉人聖裔賢裔

如見列朝官則以品序

貢監

生東位西上西位東上皆重行北面

右辨位

鑾輿出宮

儀詳吉禮

皇帝詣

大成殿釋奠

先師

詳吉禮釋奠儀

禮畢出大成門就大次更補服少竢王公

以下咸更補服王公於大次之南祇候大學士偕

朝官衍聖公率五經博士聖裔賢裔先詣彞倫堂  
庭內東西祇候祭酒司業率所屬及各學教習進  
士舉人諸生於太學門內階下東西序立祇候禮  
部尚書奏請

皇帝詣彞倫堂行講學禮太學鳴鐘鼓

皇帝出大次至廟門外乘輿前引後扈如常儀禮部尚  
書侍郎恭導入太學中門王公隨入祭酒以下跪  
候過興均隨入

皇帝陞堂降輿

御寶座禮部尚書侍郎前引內大臣止立門外侍衛夾  
兩階翼立後扈內大臣於

御座兩旁侍立王公立階上左右記注官升西階入右  
門就位執事官咸就位鳴贊贊贊齊班序班分引衍  
聖公祭酒司業以下至庭東西拜位北面立贊進  
衆進贊跪叩興行三跪九叩禮興退復位

皇帝賜王公大臣坐鴻臚寺官引王公由左右門入序



班引衍聖公大學士九卿詹事升東西階隨入咸  
按班就位一叩坐翰詹四品以下官國子官六堂  
各學師儒五經博士各氏後裔進士舉人肄業諸生  
進就東西階下圜堂外聽講鳴贊贊進講滿漢祭  
酒二人升東階入自左門司業二人升西階入自  
右門均北面立贊舉案國子官進舉經案恭設

御前

皇帝賜講官坐祭酒司業各就東西講案一叩坐祭酒

以次講書義司業以次講經義講畢贊舉案國子  
官舉經案復幄東出王公大臣起立聽講官退復  
位祭酒司業出降階復庭中東西拜位國子官各  
學教習進士舉人諸生從就拜位北面立

右講書

禮部尚書進奏傳

制鳴贊贊有

制祭酒以下皆跪宣制官進至中門左宣

制曰聖人之道如日中天講究服膺用資治理爾諸師  
生其勉之宣畢退鳴贊贊叩興祭酒以下行三跪  
九叩禮興以次先詣成賢街道右序立祇候

皇帝賜王公大臣茶如儀

詳見  
朝儀

畢仍引自左右門出降

階東西序立祇候禮部尚書奏禮成

皇帝降座乘輿扈衛如來儀由太學門出祭酒以下咸  
跪送候

駕過興退

法駕鹵簿前導導迎樂作奏禧平之章辭曰崇聖尊道  
乾德下交思樂多士化流芹藻鼓篴徵經術昭聽  
講環宏育陶

皇帝還宮

儀詳吉禮

右禮成回鑾

臨雍禮成衍聖公率五經博士各氏後裔祭酒司業率  
屬暨各學教習進士舉人貢監肄業諸生各具表  
送禮部翼日五鼓鴻臚寺官豫設表案於

太和殿內之左南北肆禮部儀制司官奉表陳於案  
樂部率和聲署入展樂懸鑾儀衛率官校入陳

法駕鹵簿均依常次記注官侍班執事各官王公文武  
百官立位拜位如三大節朝賀儀辦丹墀內謝

恩班位衍聖公祭酒在東司業在西國子官各學教習  
五經博士進士舉人各氏後裔貢監生以次從東  
西班後立位東西面北上拜位北面東班西上西  
班東上與太學行禮同漏未盡王公百官朝服畢

會如常儀五經博士暨諸生各以其職公服隨會  
午門外闕下質明鴻臚寺序班以次引入執事官咸  
入就位禮部尚書侍郎奏請

御殿

午門鳴鐘鼓

皇帝禮服乘輿出宮

御太和殿作樂鳴鞭並如常儀丹陛樂作鴻臚寺序班  
分引謝

恩各官就丹墀東西拜位北面立鳴贊贊進皆進贊跪  
皆跪樂暫止贊進表宣表官入

殿左門就案奉衍聖公表文出至檐下正中北面跪  
大學士二人左右跪展表宣表官宣畢興仍奉進

復於案

祭酒表設而不宣

退樂作謝

恩各官聽贊行三跪九叩禮興引退復位樂止

賜王公大臣衍聖公祭酒司業茶畢鳴鞭作樂

皇帝還宮

禮均與朝儀同

禮部官以表送內閣王公百官皆退

是日

賜衍聖公等燕於禮部

詳筵燕儀

右表謝

皇帝東巡狩詣

闕里講書於詩禮堂前期禮部具奏

命行在大臣會衍聖公選聖裔賢裔二人充經書直講

翰林院官擬篇目撰講章豫進

御覽



欽定恭繕以竣

右戒辦

屆期工部官張

御幄設

寶座於詩禮堂正中南向武備院官供

御座鋪陳鴻臚寺官於

御幄前設經書案堂東設勅案均東西肆設講案於西

檐下南北肆是日黎明內閣中書奉

勅陳堂內東案翰林院官奉

御覽講章陳於幄前中案奉進講副本陳於講案皆書

左經右畢退

右陳設

辨班位記注官立堂內西柱下東面大學士一人  
立東檐下宣勅官一人立大學士後皆西面鴻臚  
寺卿二人鳴贊二人立東西階上東西面序班二  
人立於庭西執事官一人立序班之下均東面

右序位

鑾輿出行宮

儀詳吉禮

皇帝詣

大成殿釋奠

先師

詳吉禮里釋奠儀

闕

禮畢出同文門至奎文閣前就大次

少皞扈從大學士以下京堂科道以上守土官巡

撫司道於承聖門左以次序立衍聖公率東野氏

孔氏顏氏曾氏孟氏仲氏閔氏冉氏言氏卜氏顓

孫氏端木氏有氏五經博士及直講官於門右以  
次序立禮部尚書奏請

皇帝詣詩禮堂行講學禮

皇帝出大次乘輿前引後扈如常儀至承聖門外各官  
跪迎候過輿隨入門內左右序立如初司道官候  
於門外

皇帝至詩禮堂前降輿

御寶座禮部尚書侍郎前引內大臣止立門外侍衛夾

東西階下翼立後扈內大臣於

御座兩旁侍立記注官升西階入右門就位大學士升  
東階立東檐下執事官咸入就位鳴贊贊齊班序  
班引衍聖公以下就庭西拜位北面立贊跪叩興  
行三跪九叩禮興贊誦書直講一人出班升西階  
詣講案前跪三叩興就案西東面講四子書畢降  
階復位次直講一人出班升階講經如講書之儀  
右進講

鴻臚寺卿進至中門之左奏宣

勅鳴贊贊跪行聖公以下皆跪大學士入左門就案奉  
勅出堂中門授宣勅官奉至階前西面宣

勅曰至聖之道與日月並行與天地同運萬世帝王咸  
所師法下逮公卿士庶罔不率由爾等遠承聖澤世  
守家傳務期型仁講義履中蹈和存忠恕以立心敦  
孝弟以修行斯須弗去以奉先訓以稱朕懷爾等其  
祇遵毋替宣畢奉

勅降中階左西面授衍聖公衍聖公恭受執事官趨進  
跪奉以興退贊叩興衍聖公率博士以下謝

恩行三跪九叩禮興豫往毓粹門外祇候各官咸出禮  
部尚書奏禮成

皇帝降座導從如來儀至毓粹門就大次更常服出祇  
謁

孔林

儀詳吉禮

禮畢

還行宮各退

右禮成還行宮



欽定大清通禮卷三十四

欽定四庫全書

欽定大清通禮卷三十五

嘉禮

貢舉之禮以子午卯酉歲秋八月

如特開恩科不拘年間以

二月大比直省府州縣學諸生而賓興之曰鄉試順

天鄉試府尹領之府丞提調試闈內外事宜各府州縣禮送學政所錄羣士赴

京師國子監錄肄業貢監生送府提調官按府州縣

欽定四庫全書

欽定大清通禮  
卷三十五

簿籍應試諸生序定名冊備試卷依時畢辦將屆  
期禮部疏請

命正考官一人副考官一人同考官十有八人內簾監  
試御史收掌官各二人外簾監試御史四人外闈  
巡察御史四人受卷彌封謄錄對讀四所官各四  
人試前三日傳集疏列各官平明朝服會

午門外闕下祇候

旨下內閣禮部侍郎一人率官屬詣內閣奉疏出承

命各官出班餘退侍郎朝服直

闕左門前西面立官屬奉疏從考官以下序立於甬道東北面重行西上官屬起函以疏授侍郎各官跪侍郎以次展疏宣

旨訖授官屬納於函退各官均行三跪九叩禮興皆退出東長安門赴順天府筵燕

詳筵燕儀

遂偕府丞入闈

御史會封內外諸門以時啟閉稽出入

右命試官執事官

欽定四庫全書

欽定大清通禮  
卷三十五

二

試前二日巡察御史啟門進試卷及謄錄生醫匠  
吏役皆搜檢乃入闔門提調官監試御史坐至公  
堂籤制手四所官各治其事視吏鈐諸生坐號於卷  
面以辨號舍按冊序次書諸生姓名於版版率五  
十人以待唱名序進

右外簾供備

試前一日五鼓順天府尹詣試院考官奏請題目  
內簾吏傳金外簾吏報鼓考官奉奏章立內龍門

內提調官立於門外監試御史會啟門

凡內龍門啟閉傳金

報鼓為節皆監試御史會蒞之後仿此

考官跪舉奏章授提調官提

調官跪接興闔門由中道降鼓吹作監試御史啟

外龍門及二門巡察御史會啟大門

凡大門啟閉以鼓吹為節

皆監試巡察御史會蒞之後仿此

府尹立門外丞授府尹如前儀

闔門入府尹詣

乾清門轉奏

皇帝命首場四子書暨二場五言八韻排律詩題目緘

封加函府尹奉詣試闈轉授考官啟門闔門均如  
前儀考官跪接入恭騰並出論題付梓人刊題紙  
右命試題

是日出諸生姓名版分設東西門外持版胥一人  
主進吏一人平明應試諸生畢集主進吏以版序  
諸生於門外胥持版先由東西門魚貫序進受照  
入簽宛平大興二縣泣之又進聽唱名巡察御史  
泣之又進聽搜檢及大門再聽搜檢皆

欽命大臣泣之廼交照入簽主進吏以版出諸生進至  
二門聽唱名給卷監察御史泣之入外龍門歸號  
舍晡後畢入御史闔內外門鎖鑰加封會提調官  
視吏徧封諸號舍門禁斷出入及夜明鐙嚴棘垣  
巡警言試日五漏交考官函封題目由提調官轉授  
府尹送內閣恭進

御覽啟門闔門如請題目之儀漏未盡復啟內龍門考  
官坐門內提調官坐門外吏舁題紙及門提調吏



於門外接出闔門以題紙徧布諸生供給官早晚  
具食飲送號舍皆提調官蒞視之越日完卷提調  
官會御史啟號舍門諸生持卷赴至公堂交受卷  
官鼓吹作啟門各給照出簽序出二場試排律詩  
欽命題目五經義三場試策均由考官擬題目儀與首  
場同

右考試

既畢試受卷官斥去不合式者彌封所糊姓名坐

號別鈐內號登諸簿籍謄錄所易書以朱對讀所  
校讐訛錯改注以紫皆提調官泣視之既畢外監  
試視吏送入內簾內監試視收掌官受卷啟門闔  
門如初乃分朱卷於同考各官閱以藍筆有佳卷  
則薦內監試書薦官職銜送考官閱以墨筆入選  
之卷副考官書取正考官書中不入選者批摘瑕  
疵三場試卷皆如之閱將畢豫擇揭曉日移提調  
官轉飭內外供辦前三日考官選中式上卷十本

密封具奏由提調官轉授府尹進呈

御覽

皇帝親定甲乙封還考官均如請題

命題之儀考官祇受啟封及中式諸卷各書名次於卷  
首前一日設案於內簾堂內正副考官府尹案南  
向提調監試官北向同考官東西向設榜案於中  
設卷案於考官案前晡後府尹齋印至闈提調監  
試官啟大門延入遂徧鎖諸門及夜明燭內簾官

於內龍門內府尹及外監試官於門外啟門吏奉  
印前府尹入各官皆入相見揖升堂吏置印於府  
尹案上外簾吏舁墨卷陳於堂東內簾吏舁中式  
朱卷陳於卷案書榜吏以榜紙設於榜案均立其  
次御史封龍門嚴出入衆揖就位吏啟箱取朱卷  
置案上啟封高唱卷面名次及內號堂東吏檢墨  
卷持至案前校對朱墨卷相符遂拆墨卷彌封以  
墨卷授正考官書名次以朱卷授副考官書姓名

別錄一紙授吏依次唱姓名及某府州縣某生習  
某經徧告在位者書榜書題名錄既畢吏歛朱墨  
卷於箱奉印鈐榜封題名錄於函置中案上前設  
香案主考官以下更朝服詣香案前重行北面行  
三跪九叩禮興傳金報鼓自內龍門至大門洞開  
輿人以采亭入榜出吏奉印前府尹與考官揖出  
及至公堂陳榜於亭舁行鼓吹前導懸揭順天府  
衙前各官皆出提調官以題名錄送內閣恭進

御覽以卷送禮部考官復

命事竣退翼日筵燕於順天府如儀

詳筵燕儀

右揭曉

直省鄉試布政使司領之監臨以巡撫提調監試以各道或府佐將屆期禮部疏列京朝官進士出身資階及格者密題請每省

命考官正一人副一人侍郎宣

旨於

午門外如儀給乘傳分詣典試之省各省巡撫豫調  
取所屬科目出身府佐及州縣充內簾同考官及  
外簾四所官畢俟省會布政使司簿籍應試諸生  
備試卷治試闈內外事宜依時畢辦考官至居館  
於外提調官資廩餼謹其出入試前二日筵燕於  
布政司堂上如儀

詳筵燕儀

遂偕監臨提調監試內外

簾各官入闈考官擬題目試士監臨官疏進

御覽並達禮部揭曉前夕布政使齎印入闈鈐榜揭榜

於布政司衙前翼日筵燕如儀

詳筵燕儀

監臨官上題

名錄解中式朱墨卷考官選試藝每題一篇授布政使刊試錄送禮部彙進

皇帝仍乘傳以事竣復

命其試士儀注與順天府鄉試同

右直省鄉試

鄉試之明年以丑未辰戌歲三月

特開恩科間試用八月試

天下貢士於禮部曰會試豫年十一月禮部疏列



郎中員外郎主事請

命正副提調各一人及本年正月疏請

命侍郎一人充知貢舉直省布政使司禮送府州縣所  
貢士赴

京師提調官治試闈內外事宜簿籍直省貢士按府  
序定名冊備試卷依時畢辦試前五日禮部疏請  
命考官同考官監試巡察及四所執事各官宣

旨於

午門外赴禮部筵燕

詳筵燕儀

偕知貢舉提調入闈

欽命四子書及五言八韻排律詩題目考官擬論題五  
經題策題分三場試貢士並如順天府鄉試之儀  
既畢試知貢舉分計各省試卷人數報禮部疏請  
中額得

旨禮部移知貢舉轉達內簾考官率同考官如額錄取  
上所取試卷禮部恭進

御覽

皇帝親定甲乙下考官書榜揭曉懸榜禮部衙前收掌  
官以卷送內閣考官以事竣復

命儀均與順天鄉試同翼日筵燕於禮部如儀

詳筵燕儀

右會試

會試揭曉後禮部上所貢天下士試策

殿廷

皇帝臨軒發策將屆期禮部備試卷疏列內閣大學士  
學士九卿翰林院學士詹事府詹事少詹事銜名

題請

命讀卷官十有四人疏列閣部院寺進士出身四品以下七品以上官暨給事中御史請

命受卷官十人彌封官十有二人收掌官十人書榜中書十有六人印卷禮部官四人監試御史四人前一日下內閣各官備朝服平明會

午門外闕下祇候禮部侍郎一人率屬詣閣承

旨接疏出宣

旨奉

命之讀卷官及執事官行三跪九叩禮如鄉會試

命官之儀讀卷官密擬策問數事奏請

欽定撰題目恭進

御覽持至內閣刊題紙密封以竣

右命讀卷官執事官

屆日鴻臚寺設案於

太和殿內之東南北肆設案於丹陛上正中東西肆

鑾儀衛陳

法駕鹵簿樂部和聲署陳樂懸各依常次光祿寺備試  
案於東西廡下案表諸貢士姓氏名次奇數在東  
偶數在西質明王公百官記注官及侍班執事各  
官入陪位如常儀讀卷及執事官入序立於丹墀  
東咸朝服諸貢士吉服會

午門外禮部侍郎二人分位

闕左右門階下序進官屬給試卷鑾儀衛官按名令

校尉一人代執筆硯器物鴻臚寺官分引貢士東  
由左掖門

昭德門西由右掖門

貞度門魚貫入序立於丹墀東西之末內閣官奉策  
題設

殿內東案上退禮部尚書侍郎詣

乾清門奏請

御殿

午門鳴鐘鼓

皇帝禮服乘輿出宮前引後扈如常儀至

太和殿北階降輿入工舉麾鼓祝中和韶樂作奏隆

平之章

樂辭詳見常朝  
陛殿儀

皇帝御太和殿陞座工偃麾戛敔樂止大學士一人進

殿左門至東案前奉策題由中門闌左出禮部尚書

一人進就中檻外大學士西面授策題復位立禮

部尚書北面跪受興奉至丹陛北面跪設於案三



叩興禮部官屬進舉案尚書隨降中階設於丹墀

甬道正中鑾儀衛官贊鳴鞭階下三鳴鞭戲竹交

丹陛樂作奏慶平之章

樂辭詳朝賀儀

鴻臚寺官引讀卷

官執事官就丹墀東拜位北面立聽贊行三跪九

叩禮興引退復位樂止次分引貢士就丹墀東西

拜位重行北面序立聽贊行禮如前儀鳴鞭

駕興中和韶樂作奏顯平之章

皇帝還宮樂止讀卷及執事官各歸其次鹵簿樂懸出

百官皆退鑾儀校舉試案分列丹墀東西

如遇風雨則設

兩廡下禮部尚書視官屬分給題目引諸貢士列班

跪受聽贊三叩興引就案北面對策晡後交卷於

受卷官以授彌封官糊名送收掌官訖皆出

若非

親策王公百官不陪位不設鹵簿樂懸餘儀同

右臨軒發策

傳臚前一日內監豫於

乾清門內便殿

寶座前設

御案又設案於

御案前之左陳筆硯讀卷官既畢閱卷選上卷十標擬

名次密封申酉刻奉至

乾清門啟奏

皇帝御便殿陞

寶座召讀卷官入內閣學士一人奉卷在前各官以次

入序立於左記注官隨入序立於右

賜讀卷官坐各於立位行一叩禮序坐內閣學士就御案前啟封恭進

御覽

皇帝親定甲第

命大學士二人就左案一人啟彌封一人依名次書訖  
密封內閣學士奉出各官隨出

皇帝還宮奉卷至內閣啟封付中書舍人書榜內閣學士奉榜詣

乾清門請

皇帝之寶鈐榜訖仍送入退

右讀卷

翼日漏未盡所司陳鹵簿樂懸於

太和殿外常次設案於

殿東及丹陛上均如

殿試之儀設雲盤黃蓋於階下設采亭御仗鼓吹於  
午門外王公百官記注官及侍班執事官序立陪位

如常儀大學士一人立

殿外東檐下禮部尚書一人立大學士之下宣制官  
一人立東樂懸之南均西面傳臚官立丹陛西階  
每成一人均東面黎明內閣學士奉榜錄詣

乾清門進

御前內閣官奉黃榜設

殿內東案退讀卷官及執事官朝服集東丹墀內諸  
貢士公服會

午門外鴻臚寺官引入序立如

殿試之儀禮部尚書侍郎詣

乾清門奏請

御殿遂前導

駕

午門鳴鐘鼓

皇帝禮服乘輿出宮

御太和殿中和韶樂作奏隆平之章辭曰啟文明五色

雲呈珊網宏開羅俊英梧岡彩鳳雖啾鳴氣如珠  
河似鏡集賢才於蓬瀛樂止鳴鞭丹陛樂作如常  
儀鴻臚寺官引讀卷執事各官就拜位北面聽贊  
行三跪九叩禮興退復位樂止大學士進

殿左門詣東案前奉黃榜出授禮部尚書尚書跪接  
興陳於丹陛案北面三叩興避立於左鳴贊贊齊  
班丹陛樂作奏慶平之章辭曰賢闕大啟五緯麗  
宵光九苞彩鳳鳴高岡日華五色舜衣裳濟濟跄



蹕多士思皇序班分引諸貢士就拜位重行北面  
立贊有

制諸貢士皆跪樂暫止宣制官宣

制曰某年月日策試天下貢士第一甲賜進士及第第  
二甲賜進士出身第三甲賜同進士出身宣畢傳臚  
官唱第一甲第一名某以次接傳至丹陛下序班  
引令出班就

御道左跪第二名就道右少後第三名就道左又後皆

臚傳者三以次前跪次唱第二甲某等若干名第  
三甲某等若干名不引出班唱畢樂作諸進士聽  
贊行三跪九叩禮興引退復位樂止贊舉榜禮部  
尚書進就榜案前北面跪奉以興降自中階禮部  
儀制司官承以雲盤十人前引張黃蓋出

太和門中門一甲三名進士隨出序班分引諸進士  
左出

昭德門右出

貞度門鳴鞭中和韶樂作奏顯平之章辭曰海榴舒  
木槿初榮宣賜宮衣最有名薰來殿角微涼生鳳  
棲梧麟在囿致皇風於昇平

皇帝還宮樂止百官皆退榜至

午門外儀制司官陳榜於采亭內跪三叩興御仗鼓  
吹前導導迎樂作奏禧平之章辭曰賢網寬整才  
俊畢登疏附先後一人維聖教澤長多士盈景運  
開龍虎蒸出東長安門懸榜街左順天府府尹觴

及第三人酒備繖蓋儀仗迎至公所府尹暨丞供  
張設席揖讓行酒三巡乃送歸第

右傳臚放榜

傳臚次日設

恩榮燕於禮部

詳筵燕儀

越五日狀元率諸進士上表謝

恩得

旨陞殿是日鹵簿樂懸陳設如常儀鴻臚寺設案於

太和殿檐下之東宣表官一人立於案旁黎明王公

百官入陪位狀元奉表率諸進士入序立東西丹  
墀均如傳臚之儀序班引狀元升東階以表恭設  
案上降階復位鴻臚寺卿二人詣

乾清門奏請

御殿遂前導

駕

午門鳴鐘鼓

皇帝禮服乘輿出宮

御太和殿作樂鳴鞭如常儀丹陛樂作鳴贊贊齊班序  
班分引狀元及諸進士就拜位重行北面贊進皆  
進贊跪皆跪樂暫止贊宣表宣表官奉表至

殿中檻外北面跪展讀訖興退以表復於案樂作狀  
元及諸進士聽贊行三跪九叩禮興引退復位樂  
止鳴鞭作樂

皇帝降座還宮序班引狀元及諸進士以次出百官皆  
退若非得

旨陞殿是日鴻臚寺設案於

午門外甬道正中鳴贊二人監禮御史二人立於案  
前序班引狀元及諸進士由東長安門入至

闕下序立甬道左右均東西面狀元奉表詣案北面  
跪陳於案三叩興退鳴贊贊齊班引狀元及諸進  
士重行北面贊跪叩興行三跪九叩禮興引退禮  
部官奉表文送內閣鴻臚寺徹案退

右表謝

殿試後旬有二日狀元率諸進士詣太學釋奠於

先師孔子行禮如儀

儀詳吉禮

右舍奠釋褐



欽定大清通禮卷三十五

欽定四庫全書

欽定大清通禮卷三十六

嘉禮

皇帝時巡省方之禮

命下禮部具議以

聞乃宣布諸司及

巡省之方豫期供備其方大吏飭文武官屬敬修廼守

攷廼職事無敢不敬戒

駕所經行守土官陸治橋梁道路水備舟楫以竣既諏  
吉閣部院寺府監疏列正貳官銜名請

旨扈蹕武衛諸臣部勒羽林衛士軍卒嚴明紀律鑾儀  
衛官整裝

御營次舍供張皆依時畢辦

右戒辦

啟行前一日遣官祇告

奉先殿如常儀衛校以行營次舍先發至日昧爽鑾儀衛

陳

騎駕鹵簿

詳見軍禮於

聖駕所出禁門外扈從王公暨文武各官服征衣佩弓矢留京王公百官蟒袍補服咸按翼序列門外祇候

鑾輅經行之地

特命扈從大臣等護視田野青苗禁踐踏者稽察馭車舟楫禁隘道爭先者皆出郊先發屆時

皇帝御征衣乘輿出宮導從扈衛如常儀鼓吹振作鹵簿前導扈從王公各官咸跪候過興乘騎隨發留京王公百官跪送候過興各退

駕出郊鑾儀校韜鹵簿

御前張黃龍曲蓋領侍衛內大臣率侍衛佩弓矢親軍二十人執豹尾槍前後翊衛豹尾槍後扈從諸王貝勒貝子公為一隊次公侯伯以下文武各官為一隊次八旗官軍依旗為隊每隊齊馬首按部就

班從人輜重隨後扈從次第進發鴻臚寺官豫傳  
百里內守土文官率紳士耆民武弁率本軍肅隊  
於

御道右百步外序列

駕至跪迎候過輿隨至

行宮行禮

右鑾輿發京師

鑾輿既啟行有司豫庀

駐蹕行營重城張幔殿黃幄

詳見軍禮

五里外遠斥堠八旗

護軍布幕環列於重城之外閣部院寺府監扈從

官布幕環列於護軍之外皆以

御營為向

駕至詣

行營王公離東旌門百步內下馬從大臣羣官百步

外下馬從均候

宮門前奏事如常及夜嚴鼓侍衛率禁旅分番警巡

五漏交外營從官衛士聽角聲治行裝蓐食陸續  
前發扈從王公大臣豫至

駕所出旌門外道右按翼序列內大臣侍衛於

宮門前序列辨色

皇帝御輿出宮翊衛如儀衆騎從地方文武官跪送道  
右如初迎禮

右行營駐蹕

御道所經



名山大川及古昔

帝王聖賢名臣忠烈陵寢祠墓在三十里以內者

行在禮部奏遣扈從大臣各一人齎香帛致祭如儀

詳見  
吉禮

右祭所過名山大川

將至

巡省之方將軍總督都統巡撫總兵官出境奉迎提督

學政布政使按察使道府以下州縣以上文官副

將以下守備以上武官於本界奉迎皆蟒袍補服  
恭蒞道右

駕至跪候過輿隨行至

行宮紳士耆民隨守土官後跪迎翼日望秩於

方嶽及祭古昔

帝王功德隆重者

先聖先師皆

親詣行禮境內山川先賢名臣忠烈祠墓遣官致祭並

如儀

詳見  
吉禮

右望方嶽秩山川百神

駐蹕行宮日

覲地方大吏察其所屬能否而黜陟之

清問民生利弊隨宜興除

臨視河防

指授方畧

召試陳詩獻賦之士量授以官廣泮宮取士之額以勵

文風

親閱方鎮重兵辨將備材武軍士技勇以講武事所過  
府州縣蠲免正賦訪問黎老凡男婦年七十以上  
者

賜銀布有差

右考績行慶惠

省方禮畢乃以回

鑾吉日宣示在京羣臣

鑾輿旋蹕地方文武大吏率屬跪送如奉迎禮內閣得  
旨宣布各部院寺府監

駕將至王公暨文官京堂武官副都統以上

內廷供奉記注翰林官科道等官咸蟒袍補服豫出郊  
至

駐蹕行營外道右序立祇候

駕至跪候過輿隨至

行營恭請

聖安各退翼日黎明序列於

聖駕所入禁門外祇候

駕至跪迎

皇帝還宮遣官祇告於

奉先殿如初禮

右回鑾

欽定大清通禮卷三十六

# 欽定四庫全書

史部

欽定大清通禮卷

三十七至  
四十

詳校官宗人府府丞

臣實光鼐

編修

臣

程嘉謨覆勘

總校官檢討

臣

何思鈞

校對官學正

臣

翁樹棠

謄錄監生

臣

黃臣鵠



欽定四庫全書

欽定大清通禮卷三十七

嘉禮

太和殿筵燕之禮恭遇

皇帝萬壽聖節元旦及

大慶典豫日禮部疏請舉行筵燕領侍衛內大臣奏

請

命進酒大臣既得

旨乃徧布諸司供備屆日尚茶庀茶尚膳庀

御饌王以下入八分公以上進饌筵牲酒光祿寺供酒

席兩翼供羊辰刻

法駕鹵簿樂懸依次陳設於

太和殿

詳見朝賀儀

笳吹隊舞雜技百戲竣於

殿外東隅尚膳總領內管領豫於

寶座前設

御筵加黃幕武備院張黃幕於丹陛上正中內務府掌

儀司設反坫於幕內尊爵金卮壺勺具禮部張青  
幕於丹墀內鹵簿之後東西各八光祿寺每幕置  
尊陳官饌具席皆有霽

右陳設

乃布席領侍衛內大臣內務府大臣禮部理藩院  
尚書侍郎朝服視席布內外王公額駙台吉及八  
班大臣等席於

殿內東西各七行東席西向當東楹西席東向當西

楹均北上

寶座左右布後扈大臣席稍後僉向

寶座前左右布前引大臣席東西相向

寶座後左右布領侍衛內大臣席又西布

日講起居注官席均南向

殿門外西檐下布左都御史副都御史席東向丹陛

左右布一二品大臣一二品世爵暨侍衛席東西

向東當東懸之外西當西懸之外北上禮部尚書

侍郎席於黃幕左內務府總管席於黃幕右丹墀  
左右青幕內布三品以下文武百官席按翼為序  
如常朝之位均東西向外國陪臣來朝者席於西  
班之末東向

右布席

已刻內外諸王貝勒貝子公額駙台吉等朝服集  
太和門外文武大臣百官朝服外國陪臣服本國服  
集

午門外午刻鴻臚寺官引宗室王公暨大臣理藩院  
官引外藩王公台吉在丹陛上又引文武百官在  
丹墀內分翼序立禮部尚書奏請

御殿

皇帝禮服乘輿出宮前引後扈如常儀

午門鳴鐘鼓中和韶樂作奏隆平之章

樂辭見朝賀儀後同

皇帝降輿入

殿北門

陞御座樂止階下三鳴鞭鴻臚寺理藩院官分引內外王公台吉暨八班大臣等由

殿左右門入就位行一叩禮坐鴻臚寺引一二品大臣暨一二品世爵侍衛等官就丹陛上又引三品以下文武各官就丹墀青幕內按翼依次於本位行一叩禮又引外國陪臣於右翼班次之末就位行一叩禮皆坐

右就位

廼進茶丹陛清樂作奏海宇昇平日之章尚茶暨  
侍衛執事官舉茶案以次由中道進至檐下進茶  
官奉茶入

殿中門王以下咸就本位跪進茶官自

寶座中陞升跪進

皇帝茶興立於右王以下行一叩禮進茶官跪受茶甌  
由右陞降出中門羣臣咸坐侍衛內務府護軍等  
分



賜王以下文武百官暨外國陪臣茶各於坐行一叩禮  
飲訖復叩坐尚茶徹茶案樂止

右進茶

尚膳總領護軍叅領內管領入

殿由東西陞升展

御筵幕執事官並徹王以下席幕各退迺進酒內務府  
掌儀司官三人由黃幕內一人奉壺一人奉爵一  
人執金卮以次進至

殿中門闕外之左西面立丹陛清樂作奏玉殿雲開  
之章進爵大臣興離席釋補服王以下皆興進爵  
大臣入

殿中門北面跪王以下咸於坐跪掌儀司官舉壺實  
酒於爵由中門入西面跪授爵興退進爵大臣奉  
爵興自

寶座中陞升至

御前當右北面跪恭進

皇帝酒興由右陞降復位行一叩禮王以下皆隨行禮  
進爵大臣興由右陞升跪受爵仍由中陞降復位  
跪掌儀司官入跪受虛爵以退迺以金卮酌酒承  
旨賜進爵大臣酒王以下起立掌儀司官入立授卮進  
爵大臣受卮行一叩禮飲卒卮掌儀司官立受虛  
卮退進爵大臣叩如初興王以下皆坐進爵大臣  
出

殿右門加補服入席坐執事官分

恩賜果食於羣臣各於坐行一叩禮樂止

右羣臣奉觴上壽

迺進饌尚膳以饌入恭進於

皇帝前中和清樂作奏萬象清寧之章執事官分

恩賜餽饌於羣臣叩如前儀尚膳率屬舁反坫案至

殿中階下領侍衛內大臣東西各二人興離席視侍

衛行殿陛諸王大臣酒光祿寺官行丹墀青幕內

文武各官暨外國陪臣酒王以下各就本位行一

叩禮飲畢叩如初坐樂止

右行羣臣酒

是時禮部滿尚書侍郎率官屬引慶隆舞進司章  
東面奏歌司舞飾面具乘馬進揚烈舞司弦司  
箏司阮司節司拍司拊諸樂人各奏其技喜起舞  
大臣十有八人朝服由

殿左門入詣正中跪三叩興退立於左循歌聲按對  
起舞歌辭曰於鑠

皇清受命於

天光延鴻祚億萬斯年天開令節瑞啟階蓂共球萬國

聖壽千齡粵自我先肇基俄朶長白之山鵲啣朱果綿  
綿瓜瓞長發其祥篤生

列祖積慶重光式擴舊疆東訖海表

聖聖相承永世克紹

一章赫赫

神功龍飛崛起戎甲十三奮迹伊始復讎靖難首克圖倫

天戈一指震懾強鄰九姓潛侵滅跡如掃蒙古五

部來奉

大號明師四路五日而殲定鼎遼瀋都城巖巖陣雲五色江冰夜凝

天助有德應運而興

二章

天亶聰明覆幬下國遠服邇歸誕

敷文德四方來附雲集景從建長命官庶職是綜爰創國書頡文義畫聲協元音萬古不易爰定軍制采旄央央或純或閒永奠八方締造鴻模創成大業錫福無疆慶鍾千葉

三章佑啟

哲嗣光闡前猷昭宗駿德誕迓

天庥攜貳綏懷朝鮮歸欵世奉東藩釐爾圭瓚三十五部

厥角稱臣西北佛土重譯來賓濯征有明耀師齊

魯電掃郊圻有而弗取畧地松杏屢殪敵軍百戰

百克用集大勲

四章

帝德廣運昭受鴻名建國紀元永定大清敦睦九族彝倫

式叙尚德親賢股肱心膂三館是闢鑑古崇儒郊

社禘嘗式賁皇圖爵秩以班六曹承政百工允釐



萬邦表正威鑠函夏德配蒼穹敬承無斁駿烈豐

功

五章

帝授神器統一寰瀛剪滅巨寇乾坤載清一著戎衣若雨

甘雨大告武成作神人主

躬親大政飭紀整綱制禮作樂昭示典常納諫任賢慎微

慮遠定律省刑萬世垂憲克勤克儉忠厚開基景

命維新兢業自持

六章

聖神建極道冠百王六十一年福祚久長天縱聰明冲齡

御宇孝奉

兩宮德隆千古三孽蠢動一舉蕩平海氛永靖浪息長鯨  
親御六師三征沙漠威肅惠懷鋤頑撫弱禹功底績虞典

時巡敷天率土莫不尊親

七章

惟天行健

神聖則之典學勤政作君作師無逸為箴宵衣旰食

一人憂勞綏此萬國文經武緯地平天成中和立極五

振金聲億萬斯年觀光揚烈敬

天勤民體元作哲

天鑒孔彰翼翼後王儀型

皇祖帝祚遐昌

八章

瑤圖炳煥六合雍熙星輝雲爛風雨以

時翕受嘉祥調和玉燭治靄皇風道光帝籙東漸  
西被北燮南諧梯航琛賁畢致堯階日升月恒萬  
邦蒙福擊壤歌衢嵩呼華祝秩秩盛儀洋洋頌聲  
紹休

烈祖永慶昇平

九章

大臣每對舞畢行三叩禮歌闋退又引

歌笳吹樂人入

殿歌辭曰

人君之樂恃此紀綱兆民之樂恃我

君王室家孔宜夫君之力朋友有成和輯之德一章瞻彼

中林芄芄萬木旃檀有香生是使獨萬類咸若攘

攘芸芸民之父母首出

一人二章大海之水不可量天府寶藏奚渠央良朋和睦

益無方

聖有謨訓垂無疆三章惟安惟和心意所欲無貳無虞朋

友式穀

四章

遵王之路兮愆尤希素位而行兮夫奚

疑

五章

載飛載翔惟翮是憑為聲為律惟心是經射

之能中惟指是憑交之能善惟和斯恒

六章

日將出

兮明星煌煌壽斯徵兮秀眉其龐三十維壯五十

遲暮莫親祖母莫尊祖父

七章

穀之成雛兮享化之

功羽用為儀兮賦命之隆

八章

嗟余生之歡樂兮似

黃離之盈昃感韶光之荏苒兮似葉上之青色

九章

一人首出萬國尊親湛恩汪濊普被生民百花敷榮一



日悅目灌頂寶光萬衆所伏

十章

維勤斯哲安不可

懷溺茲小樂至樂難期

十一章

乾照無私聖教無類

謨訓洋洋鑒斯不昧

十二章

惴惴原獸思全其身兢

兢庶士思庇後昆

十三章

息影原野消聲山澤虛棄

此身良足可惜令名是期永永無斁

十四章

際

聖明時良我福只橫被恩澤良我祿只

十五章

騏驥不羣

蹇驢鴻鵠不偕斥鷃騶虞不邇狐狸

聖哲不昵愚賤

十六章

福慧天亶誠哉難覲通人達士豈

奚易近

章十七

葱兮蒨兮山有芳蘭僅兮祁兮首有

妙鬢

章十八

歌畢又歌番部合奏樂辭曰元綽是依

明神是祇一心至誠昭事勤只巍巍

大君永底烝民中心愛戴稽首來臣念人生之無常兮  
合勤修夫善行信百行之咸善兮終和平而神聽

章一

大君至聖教敷率土救寧萬邦拜跪奉

主

章二丕顯

元后惠懷萬方國彥恭協贊邦常率土之濱誠意

溥將咸拜稽首依戴

聖皇

三章 皇皇

聖明無遠弗燭林林衆庶無思不服元元惠心為善去

惡

聖人之邦長生永樂

四章

承乾體元惟我

聖君光開草昧惟我

聖君綱紀庶政惟我



聖君父母萬國惟我

聖君惟我

聖君兮履幬如天惟我

聖君兮自新新民惟我

聖君兮中外乂安惟我

聖君兮羣慝消淪拜手稽首兮頌溢兆民

五章

大地茫茫

大海滄滄豈伊無寶求之奚方自古在昔為君為

王膺圖御宇命不于常實心實政惠此萬邦

聖御大寶緊惟我

皇緊惟我

皇兮疇可與之頡頏

六章

歌畢內務府官引朝鮮國俳入

陳百戲畢咸退

右樂舞入侑

行酒畢樂舞退尚膳升徹

御筵降王以下咸起立王公大臣出

殿左右門鴻臚寺理藩院官引王公至丹陛拜位序

立引文武大臣降東西階丹墀內百官出幕咸就  
東西拜位序立北面聽贊行一跪三叩禮丹陛大  
樂作奏慶平之章禮畢樂止鳴鞭如初中和韶樂  
作奏顯平之章

皇帝還宮樂止羣臣皆退所司徹席幕各退

右謝恩

慈寧宮筵燕之禮恭遇

皇太后萬壽聖節元旦

元旦設燕  
於次日

及諸

慶典豫日禮部疏請得

旨下所司戒備內務府奏請

欽命進爵命婦尚膳內管領庀

皇太后

皇后御饌

皇貴妃

貴妃

妃

嬪燕席親王郡王進饌筵牲酒光祿寺庀席屆日內  
鑾儀衛設

皇太后儀駕鹵簿內監設樂懸均如朝賀儀公主福晉夫  
人命婦咸朝服集

永康右門外祇謁武備院張黃幕於

慈寧門外階下正中內管領設反坫於幕下尊爵金卮  
壺勺具尚膳女官內管領妻入

殿布席

寶座前設

皇太后御筵加黃幕

寶座之東為

皇后御筵西南向稍後左右為

皇貴妃

貴妃

妃

嬪筵東西向再後左右為公主福晉以下鄉君入八

分公夫人以上席重行

殿外丹陛左右為公侯伯子男滿一二品大臣命婦  
席均重行東西向北上席皆加罩

右陳設布席

辰刻內監引公主福晉以下二品以上命婦自

永康右門入

慈寧門序立於東西丹墀內已刻禮部尚書侍郎轉傳

內監奏請

皇后詣

皇太后宮筵燕

皇后率

皇貴妃

貴妃

妃

嬪具禮服陞輿以次出

啟祥門前引命婦八人恭道導由



慈禧門入至

徽音左門外降輿入

皇后進至殿內東向立

皇貴妃

貴妃

妃

嬪隨入東西序立公主福晉夫人命婦按翼升丹陛  
東西面序立均北上引禮女官轉傳內監奏請

皇太后御慈寧宮

皇太后禮服出中和韶樂作奏豫平之章

樂辭詳朝賀儀後同

陞寶座樂止引禮女官引公主福晉夫人以次入

殿就燕位次引大臣命婦就燕位

皇后率

妃

嬪以下各於本位行一拜禮坐公主福晉以下皆一

叩各就位坐廼進茶丹陛清樂作奏海宇昇平日

之章尚茶女官率尚茶婦舉茶案由中道進至

殿檐下闕外正中北面跪進茶女官奉茶入

殿中門由中陞升至

皇太后寶座前跪進茶興東面立

皇后率

妃

嬪以下行一拜禮公主福晉以下隨行禮坐女官跪

受茶甌由右陞降退出

殿中門侍衛妻進

皇后茶次分

賜

皇貴妃

貴妃

妃

嬪公主福晉夫人命婦茶

皇后率

妃

嬪以下行一拜禮飲畢復拜如初尚茶女官率尚茶婦徹茶案退樂止

右就位進茶

迺進酒尚膳女官內管領妻入

殿展

皇太后御筵

皇后御筵霽以次展

妃

嬪以下席幕各退司爵女官自黃幕內奉壺爵金卮  
以次進至

殿中門闕外之左西面立丹陛清樂作奏玉殿雲開  
之章進爵命婦興離席

皇后以下皆興進爵命婦入

殿北面跪

皇后率

妃

嬪以下皆跪女官舉壺實酒於爵由中門入西面跪授爵興退進爵命婦奉爵興自

寶座中陞升當右北面跪恭進

皇太后酒興由右陞降復位一叩

皇后率

妃

嬪以下行一拜禮坐進爵命婦興由右陞升跪受爵

由中陞降復位跪女官入跪受虛爵廼以金卮酌酒承

懿旨賜進爵命婦酒女官入立授卮進爵命婦受卮行一叩禮飲卒卮女官立受虛卮退進爵命婦復叩如初興退入席坐執事女官分

恩賜果食於各席

皇后以下行一拜禮樂止

右奉觴上壽



迺進饌尚膳女官率尚膳婦以饌入恭進於

皇太后前中和清樂作奏萬象清寧之章執事女官分  
賜餽饌於各席

皇后以下拜如前儀樂止尚茶女官舉反坫案進至殿  
陛下侍衛妻進

皇后前酒次分

賜

皇貴妃

貴妃

妃

嬪公主福晉夫人命婦酒

皇后率

妃

嬪以下行一拜禮飲畢復拜如初坐是時內監下宮

門簾禮部滿尚書侍郎引慶隆舞進至丹陛舞揚  
烈舞次引隊舞大臣進至丹陛舞喜起舞畢笳吹

進奏朝鮮國俳進百技並作畢各退

右行酒樂舞入侑

內監啓簾內管領妻升徹

皇太后御筵退

皇后

皇貴妃

貴妃

妃

嬪皆興離席就

殿內拜位立公主福晉夫人出

殿左右門暨大臣命婦侍衛妻按翼於丹陛上拜位

立均北上丹陛大樂作奏益平之章

樂辭詳朝賀儀

皇后率

妃

嬪以下謝

恩行二肅一跪一拜禮畢樂止引禮女官轉傳內監奏請

皇太后還後宮中和韶樂作奏履平之章

皇太后還宮樂止引禮女官奏禮畢恭引

皇后

皇貴妃

貴妃

妃

嬪降階仍由

徽音左門出陞輿還宮內監引公主福晉命婦各退

右謝恩

歲除日

賜外藩蒙古筵燕於

保和殿前期內務府庀饌奏請

命進爵大臣既得

旨下所司戒備屆日樂部和聲署入陳中和韶樂於

殿檐下左右陳丹陛大樂於

中和殿北檐下左右笳吹隊舞雜技百戲竝於

殿外東隅武備院張黃幕於

殿南正中內務府管領設反玷於幕內尊爵金卮壺  
勺具尚膳總領於

寶座前設

御筵

殿內左右布外藩王公暨內大臣入殿文武大臣席  
寶座左右陞布後扈大臣席前左右布前引大臣席後  
左右布領侍衛內大臣暨記注官席丹陛上左右

布台吉侍衛席均按翼按品為序東西向北上理  
藩院尚書侍郎慶隆舞大臣席

殿東檐下西面禮部尚書侍郎內務府總管席黃幕  
左右東西面已刻羣臣朝服畢會午刻

皇帝御殿行燕禮凡就位進茶進爵行酒樂舞入侑燕  
畢謝

恩諸儀節均與

太和殿筵燕儀同



右除夕燕

歲春正月上元節

賜外藩筵燕於

圓明園

正大光明殿豫日戒所司庀饌屆日內務府掌儀司  
率內監陳中和韶樂於

殿檐下左右陳清樂於左陳丹陛大樂於

出入賢良門內左右笳吹隊舞雜技百戲竣於

殿外東西隅武備院張黃幕內務府掌儀司官設反  
坫爵於門內正中均如式尚膳總領於

寶座前設

御筵布領侍衛內大臣暨記注官席於

寶座後左右僉向布內外王公貝勒及入殿大臣席於  
殿內左右布貝子公額駙台吉與燕大臣侍衛等席  
於

殿檐下及丹墀左右均按翼為序東西面北上理藩

院尚書侍郎席

殿東檐下西面禮部尚書侍郎席黃幕左內務府總  
管席黃幕右東西面已刻羣臣蟒袍補服畢會午  
刻

皇帝御殿行燕禮中和韶樂作奏怡平之章辭曰皇心  
保太和海宇昇平樂事多瓊樹長新柯冰泮春流  
漲玉河晴雲展細羅擎堯酒泛天波花舞鳥能歌  
齊拜手賦卷阿燕畢

皇帝還宮樂奏昇平之章辭曰時雍頌帝堯玉珮鏗鏘  
慶早朝紫禁瑞烟飄春意凌寒上柳條和風禁苑  
饒陳仙樂奏箭韶三五正良宵宮漏永月輪高餘  
儀節均與

保和殿筵燕同若

賜燕於

保和殿如歲除燕之儀

右上元節燕

臨雍禮成

賜講官及有事諸臣燕於禮部精膳司視人數戒光祿寺庀饌是日露臺上望

闕設香案布席於堂精膳司官朝服視設衍聖公內閣大學士學士翰林院詹事府禮部都察院國子監太常寺光祿寺鴻臚寺暨侍班執事各官五經博士聖裔賢裔咸與燕三品以上人專席四品以下二人共席均按品為序至時羣官朝服畢會

無職

金史卷三十一  
禮志  
者公鴻臚寺序班引詣香案前聽贊行三跪九叩

禮畢各就席坐光祿寺進茶衆於坐次行一叩禮  
進酒叩如初酒三行燕畢各一叩興序班引詣香  
案前行一跪三叩禮所司徹燕席羣官各退

右臨雍燕

經筵禮成

賜進講侍班執事諸臣燕於

協和門禮部精膳司戒光祿寺庀饌是日禮部光祿

寺官視布席於門南講官大學士尚書侍郎左都御史副都御史通政使副使大理寺卿少卿詹事少詹事

日講起居注官鴻臚寺卿糾儀給事中御史鴻臚寺鳴贊各官依次為位席均西向以北為上屆時

文華殿進講畢

皇帝還宮羣臣易常服赴燕儀與

臨雍燕同燕畢詣

太和門外謝

恩行一跪三叩禮畢各退

右經筵燕

勅命恭修

實錄

聖訓等書

賜總裁以下官燕於禮部前期禮部疏請得

旨乃奏



命大臣主席所司戒光祿寺庀饌屆日望

闕設香案布席於堂總裁官主席大臣專席西向禮  
部尚書侍郎專席東向纂修提調收掌謄錄繙譯  
各官二人共席左右分行相向羣官朝服赴燕畢  
謝

恩行禮如儀或設燕於館燕畢詣金水橋謝  
恩餘均如前儀

右修書燕

凱旋燕勞之禮大軍凱旋

皇帝燕勞大將軍諸從征大臣將士卒伍咸與燕前期  
飭所司戒備屆日樂部和聲署陳樂懸筚吹隊舞  
雜技百戲並集祇竢光祿寺庀饌筵內務府張黃  
幕設

皇帝御筵於殿中設入燕王公大臣席於左翼設大將  
軍從征大臣將士席於右翼皆按品為序設卒伍  
席於右翼之後屆時

皇帝御帳殿中和韶樂作奏隆平之章

樂辭詳軍禮  
凱旋儀後同

陞座樂止乃進茶丹陞清樂作

樂章樂辭隨事  
隨時撰擬後同

飲畢樂

止大將軍奉觴上壽丹陞清樂作

皇帝以卮酒親賜大將軍大將軍跪飲如進爵大臣儀  
命侍衛分賜從征大臣酒徧樂止乃進饌中和清樂作  
殿内外羣臣行酒樂舞入侑酒三巡饌再舉樂止尚

膳徹

御筵羣臣謝

恩行禮丹陛大樂作奏慶平之章

樂辭詳  
凱旋儀

畢樂止

駕興中和韶樂作奏顯平之章

皇帝還宮樂止各退餘儀節與

太和殿筵燕同

經畧大臣凱旋筵燕與燕勞大將軍同

右凱旋燕

順天鄉試主考同考執事官入闈日燕於順天府

以府尹主席其日府署望

闕設香案樂部和聲署陳樂委辦供給縣佐貳官具  
燕視布席於堂主考副都統內外簾監察御史席  
均南向監臨提調席北向東西兩楹席各三行一  
行為同考官席二行為外簾官席三行為叅領守  
備及巡綽等官席印卷供給官席提調官左稍後  
供事官醫官席檐下縣令以下委辦供給官席露  
臺上均東西向平明主考以下官詣

午門承

旨謝

恩畢赴燕監試御史至二門內降輿主考副都統至堂  
下降輿治中通判迎於儀門外尹丞迎於堂檐下  
禮生引至香案前聽贊行三跪九叩禮揖讓升堂  
縣佐官分表花幣府尹立堂檐下執事官授爵酌  
酒府尹南向揖酹酒三偕丞揖主考都統監試官  
就位府佐揖同考官就位主考各官揖尹丞如之  
酒三行饌再舉燕畢復詣香案前行一跪三叩禮

主考以下乘輿出送如迎禮揭曉翼日復燕是日  
府堂陳設布席如前儀設鄉貢士席於階下第一  
名席稍前西向諸貢士席東西向黎明主考各官  
朝服貢士吉服赴

午門謝

恩畢諸貢士先詣府署二門俟主考以下至皆一揖讓  
過隨入尹丞以下迎如前儀禮生引詣香案前行  
禮畢簪花升堂和聲署樂作貢士序立階下北面

再拜主考都統監試監臨提調同考官答揖府佐  
官外簾執事官縣令以下均答拜畢各就位登歌  
鹿鳴之章燕畢謝

恩行禮如儀主考以下皆出送如迎禮

武鄉試入闈揭曉筵燕儀並同

直省文武鄉試入闈揭曉筵燕於布政使司堂上  
以布政使主席儀均與順天府燕同

右鄉試燕



會試入闈

賜有事各官燕於禮部以禮部尚書主席前期所司戒  
光祿寺庀饌至日露臺上望

闕設香案樂部和聲署陳樂於臺南禮部精膳司官  
朝服視布席堂上東當後楣設總裁知貢舉副都  
統席西向西當前楣設禮部尚書侍郎席東向左  
右楹外席各三行同考監試御史叅領叅將巡察  
外簾四所供給收掌各官席分行依次陳設南北

相向又設鳴贊醫官監門巡綽等官席於露臺上  
左右皆相向黎明總裁以下官朝服赴

午門承

旨謝

恩畢咸集金水橋禮部官屬入請赴燕各官由東長安  
門詣部主席迎於堂檐下鴻臚寺官引詣香案前  
北面序立聽贊行三跪九叩禮畢揖讓升堂和聲  
署樂作儀制司官分表花幣光祿寺官舉壺酌酒

授主席主席立堂檐下西面酌酒三乃揖總裁官  
就位正席獻爵少退揖總裁官答揖乃揖知貢舉  
副都統各就位光祿寺官分獻同考以下官酒總  
裁官詣主席席前酢如獻禮各就席坐光祿寺官  
供饌燕畢各官起席徹鴻臚寺官復引詣香案前  
行一跪三叩禮主席送總裁官如初儀羣官各退  
揭曉翼日復燕儀同

武舉會試入闈徹闈燕有事各官於兵部儀與文

會試同

右會試燕

殿試傳臚翼日

賜燕於禮部曰

恩榮燕讀卷執事各官暨諸進士咸與燕前期禮部疏  
請

命大臣主席屆日望

闕設香案樂部和聲署陳樂光祿寺具饌如禮闈儀

禮部精膳司官朝服視布席主席大臣讀卷官鑾  
儀衛使席當後楣西向禮部尚書侍郎席當前楣  
東向均專席左右楹外席各三行左一行為受卷  
官席二行為收掌官席三行為書榜官席右一行  
為彌封官席二行為監試官護軍叅領席三行為  
書榜官印卷官席供給官席露臺左鳴贊官席露  
臺右均相向二人共席一甲進士專席於供給官  
之左二甲一名三甲一名進士共席於一甲之後

均北向露臺下二甲席於左三甲席於右均共席  
左右相向平明諸進士吉服先會禮部各官朝服  
會於金水橋辰刻禮部官屬入請赴燕主席暨各  
官由東長安門詣部禮部尚書侍郎出迎於堂檐  
下乃率諸進士重行北面聽贊行三跪九叩禮畢  
升堂旅揖和聲署樂作主席為一甲進士簪花吏  
人分表金花於堂上下席間序班引一甲進士詣  
堂檐下東面立諸進士序立露臺上見讀卷官再

拜讀卷官答揖次見主席官禮部尚書侍郎鑾儀使均答揖次見執事官再拜執事官均答拜畢主席出詣堂檐下西面立光祿寺官酌酒授爵主席受爵揖酌酒三光祿寺官以次授一甲進士酒皆奉爵立飲卒三爵三揖主席答揖各官就位諸進士咸就位坐和聲署升歌啓天門之章光祿寺官行酒供饌如儀燕畢各官出席率諸進士詣香案前行一跪三叩禮席徹衆官退送如初迎禮諸進

欽定四庫全書

欽定大清通志  
卷三十七

士皆隨出

右恩榮燕

武舉

殿試傳臚後燕有事各官暨諸進士於兵部曰會武

燕儀與

恩榮燕同

右會武燕

衍聖公來朝入



觀畢

賜燕於禮部以禮部尚書主席其日設香案於露臺上  
樂部和聲署備樂光祿寺官具饌所司視布席設  
賓主席於後堂西當後楣賓主席均東向以南為  
上博士席於右楹外北向以西為上屆時速賓衍  
聖公入儀門降輿博士隨入主席迎賓於堂檐下  
肅揖並揖博士鴻臚寺官引詣香案前北面序立  
聽贊行三跪九叩禮畢升堂揖如初光祿寺官酌

酒授爵主席酌酒三揖賓即席奠爵奠箸少退揖  
賓答揖賓詣主席前酬禮如之咸坐和聲署升歌  
洙泗發源長之章酒三巡樂止供饌畢主賓興席  
徹鴻臚寺官復引詣案前行一跪三叩禮賓退主  
席送如初迎儀羣官各退

右燕衍聖公

東南海外諸國陪臣進貢入

朝畢

賜燕於禮部以禮部侍郎主席其日設香案於露臺上  
光祿寺庀饌所司視布席堂上正中位主席當後  
楣西向其右為正使席副使席正使下人專席通  
事從官席副使後從人席於西楹外二人共席均  
南向以東為上貢使至部步入儀門主席率詣香  
案前行三跪九叩禮畢升堂貢使見主席行一跪  
三叩禮主席答揖三乃即席主席舉爵貢使即席  
一叩飲酒三巡供饌燕畢謝

恩如儀貢使辭各退

右燕外國貢使

外藩蒙古王貝勒貝子公來京

朝賀元旦畢下五旗宗室王公各按旗諏吉日燕會  
一次每旗以親王郡王一人主席諸王以下咸與  
陪燕禮部尚書侍郎一人率屬觀禮屆日府內陳  
設庀饌和聲署備樂堂上設賓主席賓席居右東  
向主席居左西向禮部尚書侍郎席於主席之次

均專席北上設從官席於堂門外東向禮部司官  
席於其次均共席乃速賓賓至主人出迎行禮叙  
坐從官行禮就位並如儀詳賓禮王公相見儀和聲署樂作  
陳雜劇於門外執事官行酒進饌燕畢從官行禮  
先出主賓興席徹賓拜辭主人答禮送如初迎儀  
羣官各退

右王公燕會

欽定大清通禮卷三十七